

# Powšitkowne WOZJEWJENJA

njedźelu, 21. julija 2024

## Wužohnowanje ministrantow do Roma

Wšitcy, kotřiž pojedu na mjezynarodne putnikowanje ministrantow do Roma, zetkaja so njedźelu, 28. julija, w 12.30 hodź. w Róžeńčanskej swjatnicy. Tam jich dekan Wito Sćapan wužohnuje. Dekanatne dušepastyrstwo za džěci a młodžinu na to skedźbnja, zo měli so awta w Róžeńće prošu na łuce za cyrkwju parkować. We wsy trjebaja městno za pjeć busow.

## Swjata spowědź w Róžeńće

Wšitcy, kotřiž chcyli porciunkulski wotpusk zdobyć, maja w Róžeńće składnosć, sakrament swjateje spowědže přijec, a to sobotu, 3. awgusta, wot 17.00 do 18.00 hodź. Spowědnicy budu fararjo Michał Anders, Gerat Wornar, Šćěpan Delan a dr. Michael Kleiner.

## „Što tam spěwa, lěta, šumi?“

Pod hesłom „Što tam spěwa, lěta, šumi?“ přeprašuje sekcija Swójba Towarstwa Cyrila a Metoda z.t. (TCM) w kooperaciji z Dekanatnym dušepastyrstwom za džěci na zhromadny dzeń za šulerjow wot 4. do 6. lětnika w Njeswačanskim hrodze, kotryž budže sobotu, 10. awgusta, wot 10.00 do 14.00 hodź. Pod nawodom Madleny Mičkec, projektoweje sobudźělačerki tamnišeje přirodoškitneje stacije, a Guida Budarja, zastojnika w zawodze Sachsenforst, budu so džěci z Božej stwórbu zaběrać a zeznajomja so z ptačinu kaž tež štomami swojeje domizny. Nimo toho móža ptački picować a sej kukawč natwarić a sej jón sobu domoj wzać. Za wudawki dnja zběraja wot kóždého wobdźělnika přinošk pjeć eurow. Zajimcy měli so online pod [www.posol.de](http://www.posol.de) přizjewić. Ličba městnow je wobmjezowana. Je-li zajim jara wulki, TCM samsne zarjadowanje na dalšim terminje wospjetuje.

## Dny za nanow a džěci

„Nožicy, kamjeń, papjera“ rěka kónc tydženja, na kotryž su nanajo ze swojimi džěćimi do Smochčanskeho kubłanišća swjateho Bena přeprašeni. Tón wotměje so wot pjatka do njedźele, 23. do 25. awgusta. Přizjewjenja přijimuju hač do pjatka, 2. awgusta. Link je pod [www.posol.de](http://www.posol.de) podaty.

## Młodžina do Schmiedeberga!

Kubłanske dny serbskeje młodžiny wotměja so wot pjatka do njedźele, 27. do 29. septembra, w ponowjenym Schmiedebergskim Winfriedowym domje. Wobdźělnicy změja składnosć po přirodže pućować, so zhromadnje modlić a spěwać a so duchownje posylnejć. Zajimcy měli so hač do pónđzele, 29. julija, online přizjewić. Link nańdu pod [www.posol.de](http://www.posol.de).

## **Wulět dekanatneje młodžiny**

Wulět dekanatneje młodžiny budže sobotu, 24. awgusta. Přeprošeni su młodostni wot přichodneho 9. lětnika kaž tež młodži dorosćeni. Přizjewjenja přijimuju hač do srjedy, 7. awgusta, na internetowej stronje Worklečanskeho dekanatneho dušepastyrstwa za młodžinu. Link je pod [www.posol.de](http://www.posol.de) podaty.

## **Młodžina do Wechselburga!**

Pod hesłom „Kreuz und quer“ su młodostni na diecezanske zetkanje młodžiny do Wechselburga přeprošeni. Wone wotměje so pjatk a sobotu, 13. a 14. septembra, w tamnišim klóštrje. Serbscy wobdźělnicy móža sej tam zhromadnje dojeć. Přizjewjenja přijimuje dekanatne dušepastyrstwo za młodžinu we Worklecach, a to hač do soboty, 24. awgusta. Link k tomu kaž tež z dalšimi informacijemi je pod [www.posol.de](http://www.posol.de) podaty.

## **Dworowy swjedzeń w Hrubjelčicach**

Serbske ewangelske towarstwo a Maćijec swójba přeprošujetej wšitkich Serbow a dalšich zajimcow na lětnje pućowanje a serbski swjedzeń. Započatk je sobotu, 10. awgusta, w 14.00 hodž. na Jaworkec/Maćijec dworje w Hrubjelčicach, Čěchorčanska 16. Wottam podadža so wobdźělnicy a pućowanje do wokoliny. Po swačinje na dworje přizamknjetej so tam w 17.00 hodž. serbska ekumeniska nutrnosť z dekanom Witom Šćapanom a Serbskim superintendentom Krystofom Rummelom kaž tež program ze skupinu Šwintuchi. W bróžni budže bifej z jěždźemi přihotowany. Přeprošeni su tež wšitcy, kotřiž chcedža hakle na nutrnosť abo program přińć. Při sylnym dešču započnje so swjedzeń hakle w 17.00 hodž. w Maćijec bróžni.